



თბილისის თავისუფალი უნივერსიტეტი

კვალიფიკაციის მინიჭების წესი

თბილისი,
2024 წელი

შინაარსი

<u>მუხლი 1. ძირითადი საგანმანათლებლო ერთეულის/სკოლის ფარგლებში მოქმედი</u>	
<u>კვალიფიკაციის მიმნიჭებელი კომისია</u>	<u>3</u>
<u>მუხლი 2. კვალიფიკაციის მინიჭების წესი</u>	<u>4</u>
<u>მუხლი 3. დასკვნითი დებულებები</u>	<u>5</u>

მუხლი 1. ძირითადი საგანმანათლებლო ერთეულის/სკოლის ფარგლებში მოქმედი კვალიფიკაციის მიმნიჭებელი კომისია

1.1. თბილისის თავისუფალი უნივერსიტეტის სტუდენტისათვის კვალიფიკაციის მინიჭების საკითხს შეისწავლის და შესაბამის გადაწყვეტილებას/რეკომენდაციას ამზადებს ძირითადი საგანმანათლებლო ერთეულის/სკოლის ფარგლებში მოქმედი კვალიფიკაციის მიმნიჭებელი კომისია.

1.2. ძირითადი საგანმანათლებლო ერთეულის/სკოლის ფარგლებში მოქმედი კვალიფიკაციის მიმნიჭებელი კომისიის პერსონალურ შემადგენლობას ამტკიცებს უნივერსიტეტის რექტორი, ბრძანების გამოცემის გზით.

1.3. ძირითადი საგანმანათლებლო ერთეულის/სკოლის ფარგლებში მოქმედი კვალიფიკაციის მიმნიჭებელი კომისიის შემადგენლობაში, როგორც წესი, შედიან სკოლის დეკანი/ასოცირებული დეკანი, შესაბამისი საგანმანათლებლო პროგრამის ხელმძღვანელი, სტუდენტების დეკანი, იურიდიული სამსახურის უფროსი, ფინანსური ანალიტიკოსი, სკოლის/საგანმანათლებლო პროგრამის კოორდინატორი-კომისიის მდივანი.

1.4. რექტორის გადაწყვეტილებით, კომისიის წევრად შესაძლებელია ამ მუხლის 1.3 პუნქტში ჩამოთვლილის გარდა სხვა პირის მოწვევა.

1.5. კომისიის შემადგენლობაში შედის ძირითადი საგანმანათლებლო ერთეულის აკადემიური პერსონალის არანაკლებ 3 წარმომადგენელი.

1.6. კომისიის შემადგენლობაში შეიძლება შეყვანილ იქნეს ძირითადი საგანმანათლებლო ერთეულის დეკანი.

1.7. ძირითადი საგანმანათლებლო ერთეულის ფარგლებში მოქმედი კვალიფიკაციის მიმნიჭებელი კომისია თავისი შემადგენლობიდან, ხმათა უმრავლესობით, ირჩევს კომისიის თავმჯდომარეს.

1.8. კომისიის თავმჯდომარე ხელმძღვანელობს კომისიის მუშაობას.

მუხლი 2. კვალიფიკაციის მინიჭების წესი

2.1. კვალიფიკაციის მიმნიჭებელი კომისია უფლებამოსილია სტუდენტისათვის კვალიფიკაციის მინიჭების თაობაზე რეკომენდაცია/გადაწყვეტილება წარუდგინოს უნივერსიტეტის რექტორს იმ შემთხვევაში, თუ კუმულაციურად დაკმაყოფილებულია მოთხოვნები, რომლებიც უკავშირდება (ა) სტუდენტის აკადემიური მოსწრების მაჩვენებლებს, (ბ) სტუდენტის ქცევის „სტუდენტის ეთიკის კოდექსით“ დადგენილ სტანდარტებთან შესაბამისობას, ამ მუხლის 2.2 პუნქტის დებულებათა გათვალისწინებით და (გ) სტუდენტზე დაკისრებული ფინანსური ვალდებულებების შესრულებას.

2.2. „სტუდენტის ეთიკის კოდექსით“ დადგენილ სტანდარტებთან სტუდენტის ქცევის შესაბამისობის დადგენისას კვალიფიკაციის მიმნიჭებელი კომისია ითვალისწინებს სასამართლოს მიერ საქმის არსებითი განხილვის შედეგად მიღებულ და კანონიერ ძალაში შესულ გადაწყვეტილებას.

2.3. იმ შემთხვევაში, თუ სტუდენტსა და უნივერსიტეტს შორის მიმდინარეობს სამართლებრივი დავა, რომლის შედეგადაც შესაძლებელია გავლენა ჰქონდეს სტუდენტის აკადემიურ შედეგებზე, კვალიფიკაციის მიმნიჭებელი კომისია არ განიხილავს საკითხს იქამდე, ვიდრე არ გადაწყდება მიმდინარე სამართლებრივი დავა და არ იქნება მიღებული სასამართლოს საბოლოო გადაწყვეტილება, რათა არ დადგეს უნივერსიტეტისათვის გამორუსწორებელი და შეუქცევადი შედეგები „სტუდენტის ეთიკის კოდექსის“ იმ დამრღვევ პირზე დიპლომის გაცემის სახით, რომელსაც ეთიკის საბჭომ დისციპლინური საჩუქის სახით შეუფარდა თბილისის თავისუფალი უნივერსიტეტის სტუდენტის სტატუსის შეწყვეტა.

2.4. სტუდენტს კვალიფიკაცია ენიჭება ძირითადი საგანმანათლებლო ერთეულის ფარგლებში მოქმედი კვალიფიკაციის მიმნიჭებელი კომისიის წევრთა სრული შემადგენლობის ხმათა უმრავლესობით მიღებული გადაწყვეტილების საფუძველზე. ხმების თანაბრად გაყოფის შემთხვევაში, გადამწყვეტია კომისიის თავმჯდომარის ხმა.

2.5. კვალიფიკაციის მიმნიჭებელი კომისიის მდივანი უზრუნველყოფს სხდომის ოქმისა და რეკომენდაციის/გადაწყვეტილების შედგენას.

2.6. სხდომის ოქმს ხელს აწერს კომისიის თავმჯდომარე, კომისიის სხდომაზე დამსწრე წევრები და კომისიის მდივანი.

2.7. კომისიის სხდომის ოქმი და კომისიის გადაწყვეტილება/რეკომენდაცია დაუყოვნებლივ წარედგინება უნივერსიტეტს რექტორს საბოლოო გადაწყვეტილების მიღებისა და კვალიფიკაციის მინიჭების თაობაზე უნივერსიტეტის შესაბამისი აქტის გამოცემის მიზნით.

მუხლი 3. დასკვნითი დებულებები

3.1. წინამდებარე წესში ცვლილებების შეტანა ხორციელდება უნივერსიტეტის რექტორის ბრძანების საფუძველზე.

3.2. წინამდებარე წესის რომელიმე დებულების ძალადაკარგულად ან ბათილად აღიარება გავლენას არ ახდენს დანარჩენი მუხლების იურიდიულ ძალაზე.